

Date – 04/05/2026

Time - 7:30 -7:40 Hrs

AKASHVANI AIZAWL

REGIONAL NEWS BULLETIN

HEADLINES (MORNING)

1. Zan khat riaka lo zin Union Textiles Minister Pu Giriraj Singh chuan vawiin hian Sericulture Farm, Zemabawk ami a tlawh dawn a, hetah hian Silk Production Unit enfiahin hnathawktute a kawm ang.
2. Health Minister Pi Lalrinpuii'n Mizoram Universal Health Care Scheme hnuaiah kumin April ni 1 atanga MUHCS bill pek chhuah tawh zawng zawng chu cheng nuai 700 anih thu a sawi.
3. Tukin dar 8 atangin state pali-West Bengal, Keralam, Tamil Nadu, Assam leh Puducherry Assembly inthlan vote chhiar a ni dawn.
4. Indian Space Start-up GalaxyEye chuan khawvela OptoSAR Satellinte hmasa ber Mission Drishti a kapchhuak.



UNION MINISTER

Zan khat riaka lo zin Union Textiles Minister Pu Giriraj Singh chuan vawiin hian Sericulture Farm, Zemabawk ami a tlawh dawn a, hetah hian Silk Production Unit enfiahin hnathawktute a kawm ang.

Union Minister hian nimin khan Mizoram lo thlengin Lengpui thlawhna tumhmunah Chief Minister Pu Lalduhoma nen inkawmin Mizorama sericulture tihhmasawn dan tur an sawi dun a, Pu Giriraj Singh-a'n social media kaltlanga a sawi danin Pu Lalduhoma nen hian Mizorama sericulture tihhmasawn dan tur sawi dunin hma thar lak dan turte an sawi dun a. He tah hian Secriculture Secretary pawh a tel ve a. Silk pangang atanga lak chhuah la zai tangkai zawka hman chungchangte, Mizorama puantah lam tihhmasawn bakah puantahtute leh silk pangang hmanga thil siamchhuaktute dinhmun chawikan chungchangte an sawi dun a ni.

Union Minister hian nimin khan Lok Bhavan ah Sericulture, Cooperation, Agriculture leh Handloom & Handicraft lam hotute nen an inkawm a. He mi hnu hian Lapar Seri Boutique, Kulikawn leh Zozia Silk Emporium, Tlangnuam tlawhin mahni kutkawiha eizawngte kawm a, Cooperative Federation-a Chairperson leh member te bakah, BJP hruaitu leh Party Worker-te nen an inkawm bawk.

Union Minister hian vawiina Sericulture Farm, Zemabawk a tlawh zawh hnuah ZOHANDCO Office a tlawh dawn a, hemi zawh hian Eri Farm Lengpui ami tlawhin hemi zawh hian Delhi a pan nghal dawn a ni.

<><><>

AKASHVANI 90 YEARS

Akashvani Aizawl chuan kumina kum 90 a tlin pualin lawmna hrang hrang a buatsaih chho mek.

Akashvani Aizawl hian April ni 30 khan All India Radio in kum 90 a tlin lawmna pualin Lamp Lighting Ceremony an buatsaih a, hetah hian Akashvani Aizawl Director leh Mizoram Cluster Head Pu DR Lalropuia chuan All India Radio kum 90-na puala chhit det hawngin All India Radio din chhoh dan leh pawimawhna hrang hrang a sawi a, zai leh lam nen hun hlimawm tak buatsaih a ni.

All India Radio kum 90 tlin lawmna pual hian naktuk May ni 5 ah Concert leh Cultural programme chu Tuikhuahtlang YMA hall ah buatsaih a ni dawn a, heng bakah hian Walkathon bakah hun pawimawh hrang hrang huaihawt tum a ni.

Akashvani kum 90 tlin rual hian Akashvani Aizawl pawhin kum 60 a tling a, heng ni pawimawhah hian programme hrang hrang buatsaih tum a ni.

<><><>

MUHCS : HEALTH MINISTER

Health Minister Pi Lalrinpui'n Mizoram Universal Health Care Scheme hnuaiyah kumin April ni 1 atanga MUHCS bill pek chhuah tawh zawng zawng chu cheng nuai 700 anih thu sawiin dam lo mi 2615 enkawl tawh an ni a ti.

Health Minister hian Social media kaltlanga MUHCS chungchang a sawina ah he thu hi sawiin MUHCS 2.0 hnuaiyah cheng nuai 700 pek chhuah ani tawh tih sawiin April ni 30 ah cheng nuai 300 lai an pe chhuak a ti a, damlo mi 2615 enkawl an ni tawh a ti bawk.

<><><>

SRDC

Sialkal Range Development Council chu khaw paruk chauh huam ni lovin khaw 15 huam tura din tum a ni.

He mi chungchang hi GAD changtu Chief Minister Pu Lalduhoma chuan tun hnai khan sawiin khaw paruk chauh huam tura ruahmanna siam chhoh a nih lai-in Paite hnam bil pual ni lovin he development council a tel duh khaw dangte nen pawt khawmin hnam bil ni lo development council din tum a ni a ti. He mi chungchang hi Assembly Select Committee chuan tun hnai khan a ngaihtuah tawh a, a buaipuitu lam pawhin an remti tawh ni a hriat a ni. Sialkal Range Development Council dinna atan hian Sialkal Range Development Council Bill, 2026 chu Pu Lalduhoma hian kumin February ni 23 khan Assembly-ah a lo pulut tawh a. Sawiho

a nih hnu-ah dodaltu tlawmngai pawlte an awm avangin en that leh turin Select Committee kuta dah turin thutlukna siam a ni ta a. Hnam bik pual ni lovin he lai biala cheng eng hnam pawh hma an sawn theihna turin ruahmanna kalpui a ni dawn a ni.

Chief Minister chuan a tira tel ve duh lo khaw engemawzatin Sinlung Hills Council huam chhunga tel ve an duh tawh thu a tarlang bawk.

<><><>

PRISONS

Prisons department report hnuhnung bera inrinni-a tihchhuahah Mizoram chhungah lungin tang mi 1713 an awm mek.

Prisons department tarlan danin Central Jail, Aizawlah tang tam berin mi 828 an tang a, tang nei zinga a tlemna ber hi District Jail, Lawngtlai niin mi 74 an tang a. District Jail, Saitualah tang an awm lo thung a ni. Mizorama lungin hrang hrangah hian tang awm thei zata ruahman aia tam tanna lungin pali awmin - Central Jail, Aizawl chu mi 480 tan theihna tur a nih laiin mi 828 na tang mek a, tang thei zat tura bithliah aiin mi 348 in a tam a ni. Women's Jail, Aizawlah pawh mi 96 tan theihna tur a nih laiin mi 130 an tang mek a, District Jail, Aizawlah, mi 90 tan theihna turah mi 100 an awm mek bawk a, District Jail, Champhai, mi 105 lenna tura ruahmanah mi 198 an tang mek bawk a ni.

<><><>

DRUG HAUL

Assam Rifles leh Champhai district Zokhawthar Police Station Police te tangrual chuan Zokhawthar khua-ah methamphetamine kg 12 leh gram 93 an man.

Methamphetamine man hmasak hi Zirtawpni kha a ni a. Zokhawthar leh Myanmar inkalpawhna pakhat Balukai-ah Methamphetamine kg 3 leh gram 468 an man a, mahse, mihring man an nei lova. Inrinni khan Zokhawthar khua leh Melbuk inkarah methamphetamine kg 9 leh gram 462 an man leh a. Myanmar atanga ruihhlo tawlhurutu a puh India mi 2 leh Myanmar mi pakhat an man. Ruihhlo leh an mi mante hi Zokhawthar Police Station kuta hlan a ni a. Zokhawthar Police-te hian chhui zui-in dan hmangin hma an la chhunzawm mek a ni. Inrinni vek khan Assam Rifles leh Champhai district Excise & Narcotics department hnathawk tangho chuan Aizawl a Ramthar vengah heroin gram 397 an man bawk a. Manipur a Lamka khawpui a cheng, heroin tawlhurutu ni a hriat mi 4 chu he ruihhlo man kaihnawihah hian an man a. Ruihhlo leh a neitu a puhte hi Excise & narcotics department thuneitute kutah hlan an ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MRB

Chief Minister Pu Lalduhoma'n Mizoramah sum leh pai lam thiamna, financial literacy sang zawk mamawhna a nasa tih a sawi.

Inrinni a Mizoram Rural Bank Head Office-a Mizoram Rural Bank Branch Manager Conclave 2026 a hmanpuinaah he thu hi sawiin Chief Minister chuan a bik takin thingtlanga Mizo mipuiten bank te an mamawh hle tih a sawi a. An tana dawr awlsam nih leh zangkhai zawka dawr theih an nih a pawimawh hle tih a sawi a. Mizoram Rural Bank hotute chu mipuite mamawh phuhru tu ber an nih thu sawiin an lo tih tawh tha tak tak te chhonzawm zel chungin zau zawka hma la zel turin a ngen a ni.

Chief Minister chuan Bank Manager te chu sorkar policy a taka chantirtute an nihna chen a awm tih sawiin sorkar flagship programme Bana Kaihah pheih chuan an ni lehual tih a sawi a. India rama Regional Rural Bank thangduang tak, Mizoram Rural Bank, Mizote ta an nei chu a hlu hle tih sawiin an hmasawna chanchinin a tihlawm thin thu a sawi a. CD Ratio nei tha ber pawl Bank an ni reng mai chu a chhuanawm hle tih sawiin Bank te CD ratio a san chuan an sum dawn khawm te mipuite tan an pe chhuak tam tihna a ni tih sawiin ram hmasawn nan chu chu a pawimawh tih a sawi a ni.

MRB hi kum 1983 ah a ding tan a. Mizoram Rural Bank ah hian Govt of India in share zaa 15, Sponsor Bank SBI in zaa 35 leh Govt of Mizoram in zaa 50 an nei a ni. Regional Office 2 bakah Branch 106 an nei mek a, chung zinga 60 chu thingtlanga awm a ni a. Thawktu mi 491 an awm mek a ni.

<><><>

VOTE COUNTING

Tukin dar 8 atangin state pali-West Bengal, Keralam, Tamil Nadu, Assam leh Puducherry Assembly inthlan vote chhiar a ni dawn. Postal Ballot chhiar hmasak a ni ang a, chumi hnuah Electronic Voting Machine chhiar chhonzawm a ni dawn a. Election Commission chuan vote chhiarna hmunahte hian venhimna khauh takin a kalpui a ni.

Assam ah Assembly bial 126, Keralam ah 140, Puducherry ah seat 30 ah te April ni 9 khan vote thlak a ni a. Tamil Nadu seat 234 leh West Bengal inthlan thawhkhatna seat 152 ah te April ni 23 ah vote thlak niin West Bengal inthlan thawh hnihnaah hian seat 142 ah April ni 29 khan vote thlak a ni bawk.

<><><>

MISSION DRISHTI

Indian Space Start-up GalaxyEye chuan khawvela OptoSAR Satellinte hmasa ber Mission Drishti a kapchhuak. United States-a California atangin SpaceS Falcon

9 rocket ah he satellite hi phurh tel a ni a. Kg 190 a rit niin Mission Drishti hi private company siamah chuan khawvel bihchianna satellite lian ber a ni bawk.

Vice President CP Radhakrishnan leh Prime Minister Narendra Modia te chuan Mission Drishti satellite hlawhtling taka kahchhuah a ni chu an lawmpui thu an sawi a ni.

<><><>